

四庫全書

子部

欽定四庫全書

子部
喻林卷九十六

詳校官中書臣朱文翰

主事臣祁韻士覆勘

總校官原任中允臣王燕緒

校對官中書臣朱炳炘

謄錄監生臣潘璣

欽定四庫全書

翰林卷九十六

明 徐元太 撰

政治門

端本

聖人作則必以天地為本以陰陽為端以四時為柄以
日星為紀月以為量鬼神以為徒五行以為質禮義以
為器人情以為田四靈以為畜

禮記
禮運

上者民之儀也有司執政民之表也邇臣便辟者羣臣

僕之倫也故儀不正則民失誓表弊則百姓亂邇臣便

辟不正廉而羣臣服汙矣

大戴禮記子張問入官

上者民之表也表正則何物不正是故君先立於仁則大夫忠而士信民敦工璞商慤女憧婦空空七者教之志也七者布諸天下而不窕內諸尋常之室而不塞是故聖人等之以禮立之以義行之以順而民棄惡也如

灌

大戴禮記主言

事父可以事君事兄可以事師長使子猶使臣也使弟

猶使承嗣也能取朋友者亦能取所予從政者矣賜與

其宮室亦猶慶賞於國也忿怒其臣妾亦猶用刑罰於

萬民也是故為善必自內始也

大戴禮記
曾子立事

田無主則荒廢故用人為主今以人情為田用聖人以

為田主則人情不荒廢也

禮記正
義禮運

夫表曲者景必邪源清者流必潔猶叩樹本百枝皆動

也

後漢書李
固列傳

澄其源者流清溷其本者末濁

後漢書郎
顛列傳

今寇賊在外四支之疾內政不理心腹之患

後漢書陳蕃列傳

濁其源而望流清曲其形而欲景直不可得也

後漢書劉般傳

上邪下難正衆枉不可矯音和響必清端影緣直表

宋書

樂四志

人君之身者乃百姓之表一國之的也表不正不可求

直影的不明不可責射中今君身不能自治而望治百

姓是猶曲表而求直影也君行不能自修而欲百姓修

行者是猶無的而責射中也

周書蘇綽傳

一人之治亂在其心一國之存亡在其主

管子七
臣七主

君之在國都也若心之在身體也道德定於上則百姓

化於下矣戒心形於內則容貌動於外矣

管子君
臣下

天或維之地或載之天莫之維則天以墜矣地莫之載
則地以沈矣夫天不墜地不沈夫或維而載之也夫又

況於人人有治之辟之若夫雷鼓之動也

管子
白心

景不為曲物直響不為惡聲美是以聖人明乎物之性

者必以其類來也故君子繩繩乎慎其所先

管子
宙合

王者國之心也心治則百節皆安心擾則百節皆亂故

其身治者支體相遺也其國治者君臣相忘也

文子上德

山有猛虎林樾弗除江河納汙衆流是滯

子華子虎會問

德音者所謂聲也未聞音出而響過其聲者也

鶡冠子博選

致治之自在已者也招高者高招庠者庠

鶡冠子泰錄

本不固者未必幾確而不修者其後必墮原濁者流不

清行不信者名必耗

墨子修身

械數者治之流也非治之源也君子者治之源也官人

守數君子養源源清則流清源濁則流濁

荀子君道

上一則下一矣上二則下二矣辟之若艸木枝葉必類

本此之謂也

荀子富國

枉士無正友曲上無直下

黃石公素書安履

善響者不於響於聲善影者不於影於形為天下者不於天下於身是故百仞之松本傷於下而末槁於上商周之國謀失於曾令因於彼聖人組修其身而成文於天下矣故子華子曰丘陵成而穴者安矣大水深淵成

而魚鼈安矣松栢成而塗之人已蔭矣孔子見魯哀公
哀公曰有語寡人曰為國家者為之堂上而已矣寡人
以為迂言也孔子曰此非迂言也丘聞之得之於身者
得之人失之於身者失之人不出於門戶而天下治者
其惟知反於己身者乎

呂氏春秋
先已

今夫射者儀毫而失牆畫者儀髮而易貌言審本也本
不審雖堯舜不能以治故凡亂也者必始乎近而後及
遠必始乎本而後及末治亦然故百里奚處乎虞而虞

亾處乎秦而秦霸向摯處乎商而商滅處乎周而周王
百里奚之處乎虞智非愚也向摯之處乎商典非惡也
無其本也其處於秦也智非加益也其處於周也典非

加善也有其本也

呂氏春秋處方

治末者求其本端影者正其形

陸子術事

求遠者不可失於近治影者不可忘其容

陸子術事

心之於九竅四支也不能一事焉然而動靜聽視皆以
為主者不忘於欲利之也故堯為善而衆善至矣桀為

非而衆非來矣

淮南子
主術訓

夫鳥獸之不可同羣者其類異也虎鹿之不同遊者力不敵也是故聖人得志而在上位讒佞姦邪而欲犯主者譬猶雀之見鷓而鼠之遇狸也亦必無餘命矣是故人主之一舉也不可不慎也繩正於上木直於下非有事焉所緣以修者然也故人主誠正則直士任事而姦人伏匿矣夫人之所以莫抓瓜瓠者何也無得於五石弗犯也使人主執正持平如從繩準高下則羣臣以邪

來者猶以卵投石以火投水

淮南子
主術訓

君根本也臣枝葉也根本不美枝葉茂者未之聞也

淮南

子繆
稱訓

上多故則民多詐矣身曲而景直者未之聞也

淮南子
繆稱訓

矩不正不可以為方規不正不可以為員身者事之規

矩也未聞枉已而能正人者也

淮南子
詮言訓

使景曲者形也使響濁者聲也

淮南子
說林訓

貨之下流猶水之赴下不竭不止今大川江河飲巨海

巨海受之而欲谿谷之讓流潦百官之廉不可得也夫

欲影正者端其表欲下廉者先之身

鹽鐵論
疾貪

有正春者無亂秋有正君者無危國

說苑
建本

春致其時萬物皆及生君致其道萬人皆及治

說苑
君道

夫樹曲木者惡得直景人君不直其行不敬其言者未

有能保帝王之號垂顯令之名者也

說苑
君道

天子者天下之表也公侯者一國之儀也天子失制則

天下亂諸侯失節則其國危

列女傳
周列
國楚平伯嬴

雌之不才其卵殼矣君之不才其民野矣

揚子
先知

次三龍出於中首尾信可以為庸測曰龍出於中見其

造也

太玄經
第一中

次三鑪鈞否利用止測曰鑪鈞否化內傷也

太玄經
第六將

天清則雲霓除日月星辰昭君明下理賢愚得所也

王逸

註楚辭
九思

先有形而後有影形可忘而影不可傷

淮南子繆
稱訓解

治國之政其猶治家治家者務立其本本立則末正矣

夫本者倡始也末者應和也

武侯十六策治國

膏壤在芟而柯葉含榮率俗以身則不言而化故有唐

以鹿裘臻太平齊桓以捐紫止奢競

抱朴子外篇廣譬

渾沌之原無皎澄之流毫釐之根無連抱之枝分寸之

燼無炎遠之熱隙穴之中無炳蔚之羣鈎曲之形無繩

直之影參差之上無整齊之下

抱朴子外篇廣譬

三辰蔽於天則清景暗於地根芟斲於此則柯條瘁於

彼道失於近則禍極於遠政繆於上而民困於下

抱朴子外

篇廣

真龍而後能致雲雨明君而後道化行也

揚子法言
註先知篇

如彼日月萬景攸正

文選陸
雲譙詩

臣之所懼在於治水不自其源末流彌增其廣耳

補文
選傳

變官
官疏

君本也臣枝葉也本美則葉茂本枯則葉凋

意林子
思子

源靜則流清本正則末茂內修則外理形端則影直

意
林子

魏子

玉磨逾潔蘭動彌馨源流潔清水無濁波

藝文類聚樂部論樂詩

爾形信直影亦不曲爾聲信清響亦不濁

藝文類聚后妃部后妃箴

水清照淨表直影端

文苑英華梁武帝雜箴箴

知潔其流者澄其源直其末者正其本源源本本其惟

大道乎

文苑英華薛道衡碑

樹彼司牧既懸百姓之命及乎厭世復傾天下之心是
以一馬之奔無一毛而不動一舟之覆無一物而不沈

文苑英華
庾信連珠

道在於身不在於野化自於我不由於彼

道德經指
歸卷八

木不相摩火無由出國無亂政姦無由生

天機
經八

我王聖德如彼日輪大明御宇無幽不矚開物成務辯

別除昏十千大臣一億猛將皆王照使為國之光

大方
廣佛

華嚴經
卷十二

何為五城一者山城憑高據險斷岸周圍二者水城塹
以江河汭流四遠三者沙城曠磧懸遠外無水草四者
土城堅壁高壘內實兵儲五者人城主聖臣賢深謀遠

畧如是五城量宜相敵人城最勝我國所尊

大方廣佛華嚴經卷

二十

源清則津流應鮮根深則條穎必茂

弘明集釋駁論

尚德

斧斨民之用也禮義國家之用也

毛詩破斧

不能御民者棄其德法譬猶御馬棄轡勒而專以筴御馬馬必傷車必敗無德法而專以刑法御民民心走國

必亾

大戴禮記盛德

治國不以禮猶無耜而耕也為禮不本於義猶耕而弗種也為義而不講之以學猶種而弗耨也講之以學而不合之以仁猶耨而弗穫也合之以仁而不安之以樂猶穫而弗食也安之以樂而不達於順猶食而弗肥也

禮記
禮運

工欲善其事必先利其器若治國用禮義為器是器之利者故所治之事行必有成也

禮記正
義禮運

以不忍人之心行不忍人之政治天下可運之掌上

孟子

公孫
丑上

域民不以封疆之界固國不以山谿之險威天下不以

兵革之利

孟子公孫丑下

天子不仁不保四海諸侯不仁不保社稷卿大夫不仁不保宗廟士庶人不仁不保四體今惡死亡而樂不仁

是猶惡醉而強酒

孟子離婁上

今也欲無敵於天下而不以仁是猶執熱而不以濯也

詩云誰能執熱逝不以濯

孟子離婁上

民患虐政甚矣若饑者食易為美渴者飲易為甘德之

流行疾於置郵傳書命也

趙氏註孟子公孫丑上

今弛棄纖紈損絕梁秦必云徵生委命豈不已曉其迷
至乎煙斥廉義屏出信禮責以祈存推數遂乃未辨其

感

宋書顧
覲之傳

聖人執左契而不責於人有德司契無德司徹

老子
任契

川淵深而魚鼈歸之山林茂而禽獸歸之刑政平而百

姓歸之禮義備而君子歸之

荀子
致仕

在天者莫明於日月在地者莫明於水火在物者莫明於珠玉在人者莫明於禮義故日月不高則光輝不赫水火不積則輝潤不博珠玉不覩乎外則王公不以為寶禮義不加於國家則功名不白故人之命在天國之

命在禮

荀子
天論

為天下及國莫如以德莫如行義以德以義不賞而民勸不罰而邪止此神農皇帝之政也以德以義則四海之大江河之水不能亢矣華山之高會稽之險不能障

矣闔廬之教孫吳之兵不能當矣

呂氏春秋上德

百姓以德附骨肉以仁親

陸子道基

革堅則兵利城成則衝生若以湯沃沸亂乃逾甚是故鞭噬狗策蹠馬而欲教之雖伊尹造父弗能化欲害之心亡於中則饑虎可尾何況狗馬之類乎故體道者逸而不窮任數者勞而無功夫峭法刻誅者非霸王之業也策策繁用者非致遠之術也

淮南子原道訓

昔孫叔敖恬臥而郢人無所害其鋒市南宜遼弄丸而

兩家之難無所關其辭鞅鞜鐵鎧瞋目扼拏其於以御
兵刃縣矣券契束帛刑罰斧鉞其於以解難薄矣待目

而照見待言而使令其於為治難矣

淮南子
主術訓

府吏守法君子制義法而無義亦府吏也不足以為政

淮南子
主術訓

季子治亶父三年而巫馬期往觀化焉見夜魚釋之巫
馬期間曰凡子所為魚者欲得也今得而釋之何也漁
者對曰季子不欲人取小魚也所得者小魚是以釋之

巫馬期歸以報孔子曰季子之德至矣使人閭行若有

嚴刑在其側者

淮南子
道應訓

仁義者治之本也今不知事修其本而務治其末是釋其根而灌其枝也且法之生也以輔仁義今重法而棄義是貴其冠履而忘其頭足也故仁義者為厚基者也不益其厚而張其廣者毀不廣其基而增其高者覆語

曰不大其棟不能任重

淮南子
泰族訓

以德為國者甘於飴蜜固於膠漆是以聖賢勉而崇本

而不敢失也

春秋繁露
立元神

文子曰以御言之左手執轡右手運策不亦速乎若徒轡無策馬何懼哉孔子曰吾聞古之善御者執轡如組兩驂如舞非策之助也是以先王盛於禮而薄於刑故

民從命

孔叢子
刑論

以禮齊民譬之於御則轡也以刑齊民譬之於御則鞭也執轡於此而動於彼御之良也無轡而用策則馬失

道矣

孔叢子
刑論

師曠之調五音不失宮商聖王之治世不離仁義故有

改制之名無變通之實

鹽鐵論
遵道

義之服無義疾於原馬良弓德之召遠疾於馳傳重驛

鹽鐵論

論勇

所謂金城者非謂築壤而高土鑿地而深池也所謂利
兵者非謂吳起之鋌干將之劍也言以道德為城以仁
義為郭莫之敢攻莫之敢入文王是也以道德為軸以
仁義為劍莫之敢當莫之敢御湯武是也

鹽鐵論
論勇

更以不多斷為良鑿以不多刺為工

鹽鐵論
周秦

有聲之聲不過百里無聲之聲延及四海

說苑
政理

或曰為政先殺後教曰嗚呼天先秋而後春乎將先春而後秋乎吾見玄駒之步雉之晨雖也化其可以已矣哉民可使覲德不可使覲刑覲德則純覲刑則亂象龍

之致雨也難矣哉

揚子
先知

次六載帶

音士
德紗切

紗縣於九州測曰載帶之縣民以

康也

太玄經
第六堅

王之二姬臣實不知其美也臣之所美與王不類有名
曰仁狀若慶雲容若幽蘭藹若陽春使之輔諸侯則百
姓懷之而頌昔作九夷八蠻皆來朝有名曰義狀若凜
霜容若青松厲若秋宇使之輔諸侯則禁淫慝誅暴亂
使盜跖可化為伯夷此二姬者臣之所美也若王之姬
朝不過絲竹之奉夜不過枕席之安弛庶政棄百姓禍
足以亾國故珠玉為塵錦練為灰綺幕鏤床棲於浮雲
寶瑟箜篌寂於烟霧富貴之樂於王何有哉王不寵仁

義而昵治容臣竊以為賢王之蠱也

天錄閣外
史寵幸

天子諸侯以士為鼎以仁義為羹其馨香足以荐之上
帝達之祖考蒸之社稷布之民人夫鼎之有羹也猶士
之有仁義也鼎之馨香則王知之何仁義之為美不如
羹乎是羹也惟王與臣之師嘗之矣魯國之民不聞其
美也若仁義之羹烹一心而暢百順調太和而育庶物
若睹淵泉之洋溢而渴者不及飲觀五穀之豐茂而饑
者不及爨也賢王何不徹其鼎而舉其士舍其獸味而

陶仁義之羹乎

天祿閣外
史君賜

賢王欲輔王室而不修德是猶大舟之濟江河而焚其

楫也其不能濟亦明矣

天祿閣外
史形勢

夫繩墨者工之法度也仁義者民之正路也繩墨用則

曲木截仁義進則讒佞滅

王逸註楚
辭九辨

法制禮義可以為治之基耳非所以為治治在其人之

德猶弓矢射之具也非能必中中在其人之巧

淮南子
汜論訓

解

夫世不乏於德猶歲不絕於春也謂世衰難以德治可謂歲亂不可以春生乎人君治一國猶天地生萬物天

地不為亂歲去春人君不以衰世屏德

王充論衡
非韓篇

夫治人不能捨恩治國不能廢德治物不能去春

王充
論衡

非韓
篇

夫急轡繁策伯樂所不為密防峻法德政之所恥

抱朴
子外

篇審
舉

夫繁策急轡非造父之御嚴刑峻罰非三五之道故有

虞手不指揮口不煩言恭已南面而治化雍熙矣宓生
政以率俗彈琴詠詩身不下堂而漁者宵肅矣

抱朴子
外篇用

刑

仁愛附人堅於金石金石可銷而人不可離故君者壤
地人者舟木也未聞壤肥而舟木不茂君仁而萬民不

盛矣

劉子
愛民

政猛寧若恩法速寧若緩獄繁寧若簡臣主之際其猜

也寧信

文中子
問朗

夫不傷民之不治而伐已之能得姦猶弋者覩鳥獸挂

尉羅而喜也

補文選
鹽鐵議

以德養民猶草木之得時以仁化人猶天生草木以雨

潤澤之

意林鬼
谷子

道德之懷民猶春陽之柔物履深水而不寒結木條而

不折

意林
任子

天之為歲也先春而後秋君之為治也先禮而後刑春
以生長為德秋以殺戮為功禮以教訓為美刑以威嚴

為用故先生而後殺天之為歲先教而後罰君之為治也天不以久遠更其春冬而君也得以古今改其禮刑

哉

藝文類聚刑
法部刑法論

天道貴信地道貴貞不信不貞萬物不生

太平御覽
地部地上

歌在堂上舞在堂下歌者象德舞者象功君子上德而

下功

玉海音
樂樂舞

日昃陰生燥至風起谿谷小動海波大興高下相臨差以百尋者以其形大故也千仞之岸萬丈之崖物類登

之崖墮下顛蚊蝨螻蟻適足以游翔而犀象虎豹之糜
骸者以其形重也飄風隆盛發屋折木石飛鐵揚山陵
崩弛而人血脈不為之傷者以其暴大也隙穴之風不
動鬢眉及其中人也生百病而成死亡者以其纖介也
夫大國者江海犀象之徒也而德化者飄風隙穴之類
也

道德經指
歸卷十

創始

奕奕寢廟君子作之秩秩大猷聖人莫之

詩小雅
巧言

作之屏音之其蓄其翳脩之平之其灌其柵音啟之辟音

之其櫪其楛音居叶紀庶反攘之剔之其壓音厭其柘叶都故反

皇矣

綿綿瓜瓞音埴民之初生詩大雅綿

豐水猶以其潤澤生草武王豈不以其功業為事乎鄭氏

箋詩文
王有聲

鷓鴣言作巢之苦予羽譙譙然而殺予尾消消而斂手
口既病羽尾殺斂乃有此室巢以喻先王勤修德業勞

神竭力得成此王業

毛詩正義
鴟鴞

鴟鴞言已作巢之苦予手攬拘其草予所捋者是荼之
草其室巢所用者皆是予之所蓄為予手口盡病乃得
成此室巢用免大鳥之難喻周之先王亦勤勞經營乃
得成此王業用免侵毀之患

毛詩正義
鴟鴞

德厚者流光德薄者流早是以貴始德之本也始封必

為祖

穀梁僖公十五年

天下初作難也俊雄豪傑建號壹呼天下之士雲合霧

集魚鱗雜襲飄至風起

前漢書
蒯通傳

王者受圖咸資世德猶混成之先大帝若一氣之生兩儀是以中陽勃興資泰龍之構趾景毫垂統本吞鸞之

開基

晉書涼武
昭王列傳

聖人見鳥獸容貌草木英華始創衣冠而玄黃殊采見秋蓬孤轉杓觴旁建乃作輿輪而方圓異則

晉書輿
服志

天下殺亂高皇帝與諸侯併肩而起非有側室之勢以

豫席之也

賈子親
疏危亂

聖人師蜂立君臣師蜘蛛立網罟師拱鼠制禮儀師戰

蟻置兵衆

關尹子
三極篇

見窾木浮而知為舟見飛蓬轉而知為車見鳥跡而知

著書以類取之

淮南子
說山訓

夫本不正者未必隋始不勝者終必衰

說苑
建本

募者如畫工未施采土募之矣

前漢書註
高帝紀

譬如為人裁衣始制之洪大服者得而衣之何能更小

之乎

李善註文
選東京賦

昧且不顯後世猶怠况初制於甚泰服者焉能改裁

文選

東京賦

守成

若稽田既勤敷菑惟其陳修為厥疆畝若作室家既勤垣墉惟其塗墍茨若作梓材既勤樸斲惟其塗丹書棗

材

若考作室既底法厥子乃弗肯堂矧肯構厥父菑厥子

乃弗肯播矧肯穫

書大誥

父已致法子乃不肯為堂基况肯構立屋乎不為其易

則難者可知

孔氏傳
書大誥

苑音

鬱音彼桑柔其下侯甸掎

力活反

采其劉瘼

音

莫此下民

詩大

雅桑
柔

鳧鷖守成也太平之君子能持盈守成神祇祖考安樂

之也

毛詩
鳧鷖

鷓鴣之意如何乎言人既取我子幸無毀我室以其積

日累功作之甚苦故愛惜之不欲見其毀損

毛詩正
義鷓鴣

農夫收穫既畢布其歡樂之心共相飲食以安美之聖
王既勸民善道備足又說樂感動使其勤行善道保寧

堅固也

禮記正義禮運

古人有言曰其父析薪其子弗克負荷施將懼不能任

其先人之祿其况能任大國之賜

左傳昭公七年

國有固籍兵有常經變籍則亂失經則弱故利不百者

不變俗功不什者不易器

戰國策趙武靈王

孝子善繼人之意忠臣善成人之事子思若考作室厥

子堂而構之厥父菑厥子播而穫之

前漢書程方進傳

五穀百草秀穎成實皆因舊苗無廢絕也

前漢書註禮樂志

父有作室之意則子當築堂而構焚撩以成之父菑耕

其田子當布種而收穫之

前漢書註程方進傳

小家畜產百萬之資子孫尚恥愧失其先業况乃產兼

天下受之先帝而欲懈怠以自輕忽乎

後漢書陳蕃列傳

若劉累傳守其業庖人不乏龍肝之饌斷可知矣

南齊書崔

祖思傳

欲成方圓而隨於規矩則萬事之功形矣而萬物莫不有規矩議言之士計會規矩也聖人盡隨於萬物之規

矩故曰不敢為天下先

韓子解老

大智不形大器晚成大音希聲禹之決江水也民聚瓦礫事已成功已立為萬世利禹之所見者遠也而民莫

之知故民不可與慮化舉始而可以樂成功

呂氏春秋樂成

亂國若盛治國若虛亡國若不足存國若有餘虛者非無人也皆守其職也盛者非多人也皆徼於末也有餘

者非多財也欲節而事寡也不足者非無貨也民躁而費多也故先王之法籍非所作也其所因也其禁誅非所為也其所守也

淮南子
齊俗訓

隨人故迹不能創基造制自為新迹如鸚鵡知効人言

不能自為長主之言也

淮南子說
山訓解

父之所生其子長之父之所長其子養之父之所養其子成之諸父所為其子皆奉成而續行之不敢不致如

父之意盡為入之道也

春秋繁露
五行對

言君棄先王之法度而不奉循猶置衡稱不以量物更

任其意而商輕重必失道違人情也

王逸註楚辭九歎

俾前聖之緒布濩流行而不韞積

文選揚子雲劇秦美新

昔殷湯以七十里周文以百里興利除害天下歸之其

餌可謂芳矣南面而掌天下歷載數百到今不廢其綸

可謂多矣羣生震其澤民氓畏其罰其鈞可謂均矣功

成而不墮名立而不改其竿可謂彊矣若夫竿折綸絕

餌墜鈞決波涌魚失是則夏桀殷紂不通夫鈞術也

補文

選宋玉
釣賦

鳴鶴匪和析薪弗荷隱憂孔疚我堂靡構

藝文類聚人部鑒誠詩

天道煌煌非一帝之功王者赫赫非一家之常順命者

存逆命者亾

初學記帝王部摠叙帝王

譬如朽舍將欲崩倒不令壞故以柱支持

蘇婆呼童子經卷上

喻林卷九十六

欽定四庫全書

喻林卷九十七

明 徐元太 撰

政治門 二

法制

若網在綱有條而不紊若農服田力穡乃亦有秋

書盤庚上

日月之行冬夏各有常度君臣政治小大各有常法

孔氏

傳書
洪範

火之燁也固定上為天下者用牧

牧謂法也
冢周書周祝
汲

德法者御民之銜也。吏者轡也。刑者筴也。天子御者內
史。太史左右手也。古者以法為銜，勒以官為轡，以刑為
筴。以人為手，故御天下數百年而不解墮。善御馬者正
銜，勒齊轡，筴均馬力，和馬心，故口無聲，手不搖，筴不用
而馬為行也。善御民者正其德法，飭其官而均民力，和
民心，故聽言不出於口，刑不用而民治。

大戴禮
記盛德

古之御政以治天下者，冢宰之官以成道，司徒之官以
成德，宗伯之官以成仁，司馬之官以成聖，司寇之官以

成義司空之官以成禮故六官以為轡司會均入以為
軌故御四馬執六轡御天地與人與事者亦有六政是
故善御者正身同轡均馬力齊馬心惟其所引而之以
取長道遠行可以之急疾可以御天地與人事此四者聖
人之所乘也是故天子御者太史內史左右手也六官
亦六轡也天子三公合以執六官均五政齊五法以御
四者故亦惟其所引而之以之道則國治以之德則國
安以之仁則國和以之聖則國平以之義則國成以之

禮則國定此御政之體也

大戴禮
記盛德

御者同是車馬或以取千里或數百里者所進退緩急異也治者同是法或以治或以亂者亦所進退緩急異

也

大戴禮
記盛德

巧匠輔繩而斲胡為其棄法也

大戴禮
記四代

大哉子之教我制也政之豐也如木之成也

大戴禮
記少間

凡賣債者質劑焉大市以質小市以劑

周禮地
官質人

離婁之明公輸子之巧不以規矩不能成方員師曠之

聰不以六律不能正五音堯舜之道不以仁政不能平

治天下

孟子離婁上

聖人既竭目力焉繼之以規矩準繩以為方員平直不可勝用也既竭耳力焉繼之以六律正五音不可勝用也既竭心思焉繼之以不忍人之政而仁覆天下矣

孟子

離婁

上

夫德法者御民之具猶御馬之有銜勒也君者人也吏者轡也刑者策也夫人君之政執其轡策而已

孔子家語執轡

古者天子以內史為左右手以德法為銜勒以百官為
轡以刑法為策以萬民為馬故御天下而不失善御馬
者正銜勒齊轡策均馬力和馬心故口無聲而馬應轡
策不舉而極千里善御民者壹其德法正其百官以均
齊民力和安民心故令不再而民順從刑不用是以天

地德之而兆民懷之

孔子家語執轡

淳于髡曰大車不較不能載其常任琴瑟不較不能成
其五音騶忌子曰謹受令請謹修法律而督姦吏

史記四完

家世

百工為器物皆有尺寸斤兩皆使得宜

史記張丞相列傳註

度長短者不失毫釐量多少者不失圭撮權輕重者不

失黍累

前漢書律歷志

若夫經制不定是猶度江河亡維楫中流而遇風波船

必覆矣

前漢書賈誼傳

法禁者俗之隄防刑罰者人之銜轡

後漢書虞詡列傳

王者之法譬猶江河當使易避而難犯也

後漢書郎顛列傳

君子用法制而至於化小人用法制而至於亂均是一
法制也或以之化或以之亂行之不同也苟使豺狼牧
羊豚盜跖主征稅國家昏亂吏人放肆則惡復論損益

之間哉

後漢書仲
長統列傳

繩墨棄而不用斧斤廢而不舉

後漢書
蔡茂傳

置方員於規矩審輕重於衡石誠國家之典萬世之法

也

後漢書陳
寵列傳

夫人君之有政猶水之有隄防隄防完全雖遭雨水霖

潦不能為變政教一立暫遭凶年不足為憂誠令隄防
穿漏萬夫同力不能復救政教一壞賢智馳騫不能復
還今隄防雖堅漸有孔穴

後漢紀
孝順

若不從法是校方員棄規矩考輕重背權衡課長短廢
尺寸論是非違分理

晉書律
歷志中

夫奉聖典者若操刀執繩刀妄加則傷物繩妄彈則侵

直

晉書
刑法

馬能千里不免羈絆明畜生不可以人御也

晉書慕
容垂傳

縣衡於上四海共稟其平法亂於朝民無所措手足

宋書

柳元景
傳史臣

匠萬物者以繩墨為正馭大國者以法理為本

南齊書
孔稚珪

傳

有法度之制者不可巧以詐偽有權衡之稱者不可欺

以輕重有尋丈之數者不可差以長短

管子
明法

夫矩不正不可以求方繩不信不可以求直法令者君

臣之所共立也權勢者人主之所獨守也

管子
臣七主

夫繩扶掇以為直准壞險以為平鈞入枉而出直此言

聖君賢相之制舉也

管子
宙合

法者天下之儀也所以決疑而明是非也百姓所懸命

也故明王慎之

管子
禁藏

主上視法嚴於親戚吏之舉令敬於師長民之承教重

於神寶

管子
禁藏

夫為國之本得天之時而為經得人心而為紀法令
為維綱吏為綱罟什伍以為行列賞誅為文武繕農具

當器械耕農當攻戰推引鉞耨以當劔戟被簔以當鎧
鑄蒞笠以當盾櫓故耕器具則戰器備農事習則攻戰

巧矣

管子
禁藏

規矩者方圓之正也雖有巧目利手不如拙規矩之正
方圓也故巧者能生規矩不能廢規矩而正方圓雖聖
人能生法不能廢法而治國故雖有明智高行倍法而
治是廢規矩而正方圓也

管子
法法

以規矩為方圓則成以尺寸量長短則得以法數治民

則安

管子形勢解

權衡者所以起輕重之數也然而人不事者非心惡利也權不能為之多少其數而衡不能為之輕重其量也

權衡平正而待物故姦詐之人不得行其私

管子明法解

人君者覆載萬民而兼有之燭臨萬族而事使之是故

以天地日月四時為主為筭

音質竹器所以量物

以治天下

管子版法

解

如四時之不貸如星辰之不變如宵如晝如陰如陽如

日月之明曰法

管子正

彼立表而望者不惑按法而割者不疑固言有以希之

也夫望而無表割而無法其惑之屬耶

鶡冠子天權

節璽相信如月應日

鶡冠子天則

一目之羅不可得雀籠中之鳥空窺不出

鶡冠子世兵

人以度審長短以量受少多以衡平輕重以律均清濁

以名稽虛實以法定治亂

尹文子大道上

我愛白而憎黑韻商而舍徵好臙而惡焦嗜甘而逆苦

白黑商徵臙焦甘苦彼之名也愛憎韻舍好惡嗜逆我

之分也定此名分則萬事不亂也

尹文子
大道上

將為胠篋探囊發匱之盜而為守備則必攝緘滕固局
鏑此世俗之所謂知也然而巨盜至則負匱揭篋擔囊
而趨唯恐緘滕局鏑之不固也然則鄉之所謂知者不
乃為大盜積者也所謂聖者有不為大盜守者乎故曰
脣竭則齒寒魯酒薄而邯鄲圍聖人生而大盜起掎擊
聖人縱舍盜賊而天下始治矣夫川竭而谷虛丘夷而

淵寶聖人不死大盜不止雖重聖人而治天下則是重
利盜跖也為之斗斛以量之則并與斗斛而竊之為之
權衡以稱之則并與權衡而竊之為之符璽以信之則
并與符璽而竊之為之仁義以矯之則并與仁義而竊
之何以知其然邪彼竊鉤者誅竊國者為諸侯諸侯之
門而仁義存焉則是非竊仁義聖知邪故曰魚不可脫
於淵國之利器不可以示人彼聖人者天下之利器也

莊子
胠篋

百工為方以矩為園以規直以繩正以縣無巧工不巧
工皆以此五者為法巧者能中之不巧者雖不能中放
依以從事猶逾已故百工從事皆有法所度今大者治
天下其次治大國而無法所度此不若百工辯也墨子
法儀
背法而治此任重道遠而無馬牛濟大川而無船楫也

商子
弱民

夫離朱見秋毫百步之外而不能以明目易人烏獲舉
千鈞之重而不能以多力易人夫聖人之存體性不可

以易人然而功可得者法之謂也

商子
錯法

先王懸權衡立尺寸而至今法之其分明也夫釋權衡而斷輕重廢尺寸而意長短雖察商賈不用為其不必

也夫倍法度而任私議皆不類者也

商子
修權

君舍法以心裁輕重則同功殊賞同罪殊罰矣怨之所由生也是以分馬之用策分田之用鈎非以策鈎為過

於人智所以去私塞怨也

慎子
君人

有法者以法行無法者以類舉以其本知其末以其左

知其右凡百事異理而相守也

荀子大略

三尺之岸而虛車不能登也百仞之山任負車登焉何則陵遲故也數仞之牆而民不踰也百仞之山而豎子馮而游焉陵遲故也今夫世之陵遲亦久矣而能使民

勿踰乎

荀子宥坐

繩直而枉木斲準夷而高科削權衡縣而重益輕斗石設而多益少故以法治國舉措而已矣

韓非子有度

法不阿貴繩不撓曲

韓非子有度

巧匠目意中繩然必先以規矩為度上智捷舉中事必

以先王之法為比

韓非子
有度

無捶策之威銜轍之備雖造父不能以服馬無規矩之
法繩墨之端雖王爾不能以成方圓無威嚴之勢賞罰

之法雖堯舜不能以為治

韓非子
和氏

託於屏車良馬之上則可以陸犯阪阻之患乘舟之安
持楫之利則可以永絕江河之難操法術之數行重罰
嚴誅則可以致霸王之功治國之有法術賞罰猶若陸

行之有屏車良馬也水行之有輕舟便楫也乘之者遂

得其成

韓非子
和氏

鏡執清而無事美惡從而比焉衡執正而無事輕重從而載焉夫搖鏡則不得為明搖衡則不得為正法之謂

也故先王以道為常以法為本

韓非子
飾邪

夫懸衡而知平設規而知圓萬全之道也明主使民飾於道之故故佚而有功釋規而任巧釋法而任智惑亂之道也亂主使民飾於智不知道之故故勞而無功

韓非

子飾
邪

家有常業雖饑不餓國有常法雖危不亾

韓非子
飾邪

服虎而不以桀禁姦而不以法塞偽而不以符此責育之所患堯舜之所難也故設桀非所以備鼠也所以使怯弱能服虎也立法非所以備曾史也所以使庸主能止盜跖也為符非所以豫尾生也所以使衆人不相謾

也韓非子
守道

發矢中的賞罰當符故堯復生羿復立

韓非子
用人

釋儀的而妄發雖中而不巧釋法制而妄怒雖殺戮而

姦人不恐

韓非子
用人

其心難知喜怒難中也故以表示目以鼓語耳以法教

心

韓非子
用人

釋法術而心治堯不能正一國去規矩而妄意度奚仲不能成一輪廢尺寸而差短長王爾不能半中使中主守法術拙匠守規矩尺寸則萬不失矣君人者能去賢巧之所不能守中拙之所萬不失則人力盡而功名立

韓非子
用人

教歌者先揆以法疾呼中宮徐呼中徵疾不中宮徐不

中徵不可為教

韓非子外
儲說左

椎鍛者所以平不夷也榜檠者所以矯不直也聖人之

為法也所以平不夷矯不直也

韓非子外
儲說右

今廢勢背法而待堯舜堯舜至乃治是千世亂而一治也抱法處勢而待桀紂桀紂至乃亂是千世治而一亂也且夫治千而亂一與治一而亂千也是猶乘驥駟而

分馳也相去亦遠矣

韓非子
難勢

夫棄隱括之法去度量之數使奚仲為車不能成一輪
無慶賞之勸刑罰之威釋勢委法堯舜戶說而人辯之

不能治三家

韓非子
難勢

夫良馬固車五十里而一置使中手御之追速致遠可
以及也而千里可日致也何必待古之王良乎

韓非子
難勢

今有人於此擅矯行則免國家利輕重則若衡石為方
圓則若規矩此則工矣巧矣而不足法法也者衆之所

同也

呂氏春秋處方

聖人防亂以經藝工正曲以準繩

陸子道基

天地三月而為一時故祭祀三飯以為禮喪紀三踊以

為節兵重三軍以為制

淮南子天文訓

法者天下之度量而人主之準繩也懸法者法不法也

設賞者賞當賞也法定之後中程者賞缺繩者誅

淮南子主

術訓

法律度量者人主之所以執下釋之而不用是猶無轡

術而馳也羣臣百姓反弄其上是故有術則制人無術

則制於人吞舟之魚蕩而失水則制於螻蟻離其居也

援狄失木而擒於狐狸非其處也

淮南子
主術訓

良工漸乎矩鑿之中矩鑿之中固無物而不周聖王以

治民造父以治馬醫駱以治病同材而各自取焉

淮南子
繆

稱
訓

夫繫輕重不失錙兩聖人弗用而縣之乎銓衡視高下
不差尺寸明主弗任而求之乎浣準何則人才不可專

用而度量可世傳也故國治可與愚守也而軍制可與

權用也

淮南子
齊俗訓

耳不知清濁之分者不可令調音心不知治亂之源者

不可令制法

淮南子
汜論訓

夫神農伏羲不施賞罰而民不為非然而立政者不能
廢法而治民舜執干戚而服有苗然而征伐者不能釋

甲兵而制疆暴

淮南子
汜論訓

非規矩不能定方圓非準繩不能正曲直用規矩準繩

者亦有規矩準繩焉

淮南子
說林訓

循繩而斲則不過懸衡而量則不差植表而望則不惑

淮南子
說林訓

夫無規矩雖奚仲不能以定方圓無準繩雖魯般不能

以定曲直

淮南子
修務訓

雖有巧手弗修規矩不能正方圓雖有察耳不吹六律
不能定五音雖有知心不覺先王不能平天下然則先

王之遺道亦天下之規矩六律已

春秋繁露
楚莊王

孔子云美哉顏無父之御也馬知後有輿而輕之知上有人而愛之馬親其正而愛其事如使馬能言彼將必曰樂哉今日之騶也至於顏淪少衰矣馬知後有輿而輕之知上有人而敬之馬親其正而敬其事如使馬能言彼將必曰騶來其人之使我也至於顏夷而衰矣馬知後有輿而重之知上有人而畏之馬親其正而畏其事如馬能言彼將必曰騶來騶來女不騶彼將殺女故御馬有法矣御民有道矣法得則馬和而歡道得則民

安而集

韓詩
外傳

王者之制法昭乎如日月故民不迷曠乎若大路故民

不惑

鹽鐵論
刑德

水者火之備法者止姦之禁也無法勢雖賢人不能以

為治無甲兵雖孫吳不能以制敵

鹽鐵論
申論

非患鈇耨之不利患其舍草而去苗也非患無準平患

其舍枉而繩直也故親近為過不必誅是鉏不用也疏

遠有功不必賞是苗不養也故世不患無法而患無必

行之法也

鹽鐵論
申韓

設明法陳嚴刑坊非矯邪若隱括輔繫之正孤刺也

鹽鐵

論申
韓

夫少目之網不可以得魚三章之法不可以為治故令

不得不加法不得不多

鹽鐵論
詔聖

田鼠野雉意尚欲去拘制籠檻不得搖動

焦氏易林
夬之謙

大作網小作紀如網不網紀不紀雖有羅網惡得一目

而正諸

揚子
先知

或曰因秦之法清而行之亦可以致平乎曰譬諸琴瑟

鄭衛調俾夔因之亦不可以致蕭韶矣

揚子寡見

斷木為棊椀革為鞫亦皆有法焉不合乎先王之法者

君子不法也

揚子吾子

次四畢格禽鳥之貞測曰畢格禽正法位也

太玄經第二格

上九井無幹水直衍匪谿匪谷終于愆測曰井無幹法

妄恣也

太玄經第三法

民由水也濟大川者太上乘舟其次泗泗者勞而危乘

舟者逸而安虛入水則必溺矣以知能治民者泅也以
道德治民者舟也縱民之情謂之亂絕民之情謂之荒
曰然則如之何曰為之限使勿越也為之地亦勿越故
水可使不濫不可使無流善禁者先禁其身而後人不
善禁者先禁人而後身善禁之至於不禁

申鑒
政體

苟有土地百姓可富也苟有市列商賈可來也苟有士

民國家可彊也苟有法令姦邪可禁也

潛夫論
勸將

夫制法之意若為藩籬溝澗以有防矣擇禽獸之尤可

數犯者而加深厚焉

潛夫論
斷訟

夫法度明雖不聞姦姦無由生法度不明雖日求姦決其源鄣之以掌也御者無銜見馬且犇無以制也使王

良持轡馬無欲犇之心御之有數也

王充論衡
非韓篇

本者經常之法規矩之要圓鑿不可以方枘鉛刀不可以斫伐此非常用之事不能成其功非常用之器不可成其巧故天失其常則有逆氣地失其常則有枯敗人

失其常則有患害

武侯十六
策治國

亡國非無令也患於令煩而不行敗軍非無禁也患於

禁設而不正

抱朴子外
篇用刑

班倕不委規矩故方圓不戾於物明君不釋法度故機

詐不肆其巧

抱朴子外
篇用刑

仁者為政之脂粉刑者御世之轡策脂粉非體中之至

急而轡策須臾不可無也

抱朴子外
篇用刑

執轡者欲馬之尊軌也明法者欲人循治也轡不均齊

馬失軌也法不適時人乖理也是以明主務循其法

劉

術法

立法者譬如善御察馬之力揣途之數齊其銜轡以從其勢故能登阪赴險無覆轍之敗乘危涉遠無越軌之

患

劉子
法術

夫法令者人君之銜轡箠策也而民者君之輿馬也若使人臣廢君法禁而施已政令則是奪君之轡策而已

獨御之也

潛夫論
衰制

今以心察錙銖之重則莫之能識懸之權衡則毫釐之

重辨矣

劉子
正賞

夫算者不運籌策不能定其數治國者不蹈法度不能

致康哉

揚子法言
註先知篇

航傾則人危法亂則國亡

揚子法言
註寡見篇

棄騏驥而馳騁兮無轡銜而自載乘汎

汎
訃敷

以下流

兮無舟楫而自備背法度而心治兮辟與此其無異

補文

選屈原
惜往日

措鈞石使禹察之不能識也懸於權衡則釐髮識矣

林意

子慎

漁人張網於淵以制吞舟之魚明主張法於天下以制
強梁之人立法以隄民百姓不能干立防以隄水江河
不能犯防而可犯則江河成災法而可干則百姓成害

意林
阮子

有權衡者不可欺以輕重有尺寸者不可差以長短有

法度者不可巧以詐偽

意林
慎子

明鏡龜策也章程斛斗也銓衡丈尺也

意林
新論

法者主之柄吏者民之命法欲簡而明吏欲公而平林意

典論

塞一蟻孔而河決息施一車轄而覆乘止立法令者亦

宜舉要

意林物
理論

君必有明法正義若懸權衡以稱輕重所以一羣臣也

藝文類聚刑

法部刑法

匠萬物者以繩墨為政馭大國者以法理為本藝文類聚刑法

部刑
法表

人猶水也法令為隄防不固必致奔突苟無決溢使君

何患哉

太平御覽職官部良令長下

聖人之治也若平地焉聾盲跛蹇皆能復之法若邱陵也非有逸足不能超也

太平御覽人事部叙聖

牛馬之為人駕乘者非樂負千鈞之重行千里之險鞭

策痛矣

太平御覽獸部馬五

匠人不能釋尺寸而意長短廢繩墨而起平木也工人

不能置規而為圓去矩而為方

黃帝素問靈樞經逆順肥瘦

文武

張而不弛文武弗能也弛而不張文武弗為也一張一

弛文武之道也

禮記雜記下

弓弩久張之則絕其力久弛之則失其體

鄭氏註禮記雜記下

工欲善其事必先利其器文德者帝王之利器威武者

文德之輔助也

前漢書刑法志

文武遞用長久之道譬之天地昏明之迭

晉書戴若思傳

文有三侑武無一赦惠者多赦者也先易而後難久而

不勝其禍法者先難而後易久而不勝其福故惠者民之仇讐也法者民之父母也

管子法法

獸厭走而有伏網罟一偃一側不然不得大文三曾而

責義與德大武三曾而偃武與力

管子勢

文武之所由起也文者愛之徵也武者惡之表也愛惡循義文武有常聖人之元也譬之若寒暑之序時至而事生之聖人不能為時而能以事適時事適於時者其

功大

呂氏春秋名類

文武之術左右為宜卻穀敦書故舉為元帥豈以好文而不練武哉孫武兵經辭如珠玉豈以習武而不曉文

也

文心雕龍程器

五行殊性俱為人用文武異材竝為大益猶救火者或提盆榼或挈瓶瓶容一斗盂其器方圓形體雖返名質相乖至於盛水滅火功亦齊焉繳者身仰釣者身俯俯仰別狀取利同焉織者漸進耕者漸退進退異勢成務等焉墨子救宋重趺而行干木在魏身不下堂行止異跡存

國一焉文以讚治武以凌敵移捨殊律為績平焉

劉子文武

四時之行有寒有暑聖人法之故有文有武天地之位有前有後有左有右聖人法之以建經紀春生於左秋殺於右夏長於前冬藏於後生長之事文也收藏之事

武也是故文事在左武事在右

藝文類聚刑法部刑法

文武之道應物隨時譬彼蘧廬方茲芻狗執而不遣更

增其弊

道德經註疏卷六

生為殺元殺為生首二者相形吉凶著矣故知生而不

知殺者逆天之紀也知殺而不知生者反地之要也道德

經指歸

卷十二

調長祥和天之喜風也折揚奮厲天之怒風也

玉海天
文天

書

寬嚴

九三家人嗃嗃悔厲吉婦子嘻嘻終吝

易家
人

凡物以猛為本者則患在寡恩以愛為本者則患在寡

威

王弼註
易家人

天地之間有滄熱善用道者終不竭

汲冢周書
周祝解

天氣下降地氣上騰而有寒暑生焉刑新國用輕典刑
亂國用重典輕重隨俗而有寬猛異焉天道有上下交
接之義故寒暑易節政教有用俗改更之理故寬猛相

濟

尚書正
義畢命

子產猶衆人之母也能食之不能教也

禮記仲
尼燕居

今父之親子也親賢而下無能母之親子也賢則親之
無能則憐之母親而不尊父尊而不親水之於民也親

而不尊火尊而不親土之於民也親而不尊天尊而不

親命之於民也親而不尊鬼尊而不親

禮記表記

惟有德者能以寬服民其次莫如猛夫火烈民望而畏

之故鮮死焉水懦弱民狎而翫之則多死焉故寬難

左傳

昭公二十年

夫刑罰威獄以類天之震耀殺戮也溫慈和惠以放天之生殖長育也是故春一草枯則為災秋一木華亦為

異

後漢書應奉列傳

震雷電激不崇一朝大風衝發希有極日然猶繼以雲
雨因以潤物是則天地之威不可經日浹辰帝王之怒

不宜訖情盡意

吳志諸葛恪傳

寬猛兼設水火俱陳

北齊書文苑李廣傳

治大國若烹小鮮為寬裕者曰勿數撓為刻削者曰致

其鹹酸而已矣

淮南子齊俗訓

宋人有御馬者不進拔劔到而棄之於溝中又駕一馬
馬又不進又到而棄之於溝若是者三以此威馬至矣

然非王良之法也王良登車馬無罷駑堯舜治世民無狂悖王良馴馬之心堯舜順民之意人同性馬殊類也王良能調殊類之馬太公不能率同性之士然則周公之所下白屋王良之馴馬也太公之誅二子宋人之剽馬也舉王良之法與宋人之操使韓子平之韓子必是王良而非宋人矣王良全馬宋人賊馬也馬之賊則不若其全然則民之死不若其生

王充論衡
非韓篇

喻林卷九十七

欽定四庫全書

子部
喻林卷九十八

詳校官中書臣朱文翰

主事臣祁韻士覆勘

總校官原任中允臣王燕緒

校對官中書臣朱忻

謄錄監生臣潘璣

欽定四庫全書

喻林卷九十八

明 徐元太 撰

政治門 三

教化

水之流也固走下不善故有桴

汲冢周書
周祝解

下之順上當如網在綱各有條理而不亂也

孔氏傳書
盤庚上

為政之術如梓人治材為器已勞力樸治斲削惟其當
塗以漆丹以朱而後成以言教化亦須禮義然後治孔
氏

傳書
梓材

中原有菽

音叔

庶民采之螟蛉有子螺贏負之教誨爾子

式穀似之

詩小雅
小宛

天之牖民

如墮

音墮

如筮如璋如圭如取如攜

詩大
雅板

思樂

音洛

泮水薄采其芹魯侯戾止言觀其旂

思樂

泮水薄采其藻魯侯戾止其馬蹻蹻

思樂泮水薄采

其茆魯侯戾止在泮飲酒

詩魯頌
泮水

風風也教也風以動之教以化之

毛詩
關雎

麟之趾關雎之應也關雎之化行則天下無犯非禮雖

衰世之公子皆信厚如麟趾之時也

毛詩麟趾

漢廣德廣所及也文王之道被於南國美化行乎江漢

之域

毛詩廣漢

汝墳道化行也文王之化行乎汝墳之國

毛詩汝墳

行露召伯聽訟也衰亂之俗微貞信之教興強暴之男

不能侵陵貞女也

毛詩行露

飄風迴風也惡人被德化而消猶飄風之入曲阿也

毛詩

卷阿
註

猱之性善登木若教使其為之必也塗之性善著若以塗附其著亦必也以喻人之心皆有仁義教之則進

鄭氏

箋詩
角弓

教令之出如賣物物善則其售價貴物惡則其售價賤德加於民民則以義報之

鄭氏箋
詩抑

鷓恒惡鳴今來止於泮水之木上食其桑黹為此之故故改其鳴歸就我以善音喻人感於恩則化也

鄭氏箋
詩泮水

激揚之水波流湍疾行於石上洗去石之垢穢使白石
鑿鑿然而鮮明以興桓叔之德政教寬明行於民上除
去民之疾惡使沃國之民皆得有禮義也

毛詩正義
揚之水

蒹葭在衆草之中蒼蒼然彊盛雖似不可彫傷至白露
凝戾為霜則成而為黃矣以興衆民之彊者不從襄公
教令雖似不可屈服若得周禮以教則衆民自然服矣

毛詩正
義蒹葭

菁菁然茂盛者蘿蒿也此蘿蒿所以得茂盛者由生在

阿中得阿之長養故茂盛以興德盛者是學士也此學士所以致德盛者由升在彼學中得君之長育故使德

盛

毛詩正義
菁菁者莪

桑蟲自有子而蒲盧負而養之以成已子若有聖德者

能教誨爾之萬民用善道則似之矣

毛詩正義
小宛

王之不教小人如人之禁彼云無得教猱之升木若教之升木則如以塗泥塗物必附著也何者猱之性善登木今教之使登必能登木矣又喻塗之性善附著以之

塗物必著矣以興王自不教小人以仁義者若教小人以仁義則必從矣何者以人性皆有仁義因其性而道之故教之必從也

毛詩正義角弓

天王之導民也如堦然如筮然言民必應君命如堦筮之相和也如璋如圭然言民必同君心如圭璋之相合也又如往取物如手攜物言其必從君化如攜取之隨人君也

毛詩正義板

翩然而飛者彼飛鵠惡聲之鳥今來集止於我泮水之

林食我泮宮之桑黜歸我好善之美音惡聲之鳥食桑

黜而變音喻不善之人感恩惠而從化

毛詩正義泮水

天地之道寒暑不時則疾風雨不節則饑教者民之寒暑也教不時則傷世事者民之風雨也事不節則無功

禮記樂記

政之教大夫官之教士技之教庶人揚則抑抑則揚綴以德行不任以言庶人以言猶以夏后氏之祔懷袍裼

也行不越境

大戴禮記虞戴德

為人父者以為父鵠為人子者以為子鵠為人君者以

為君鵠為人臣者以為臣鵠故射者各射已之鵠

禮記射義

蒲盧取桑蟲之子去而變化之以成為已子政之於百

姓若蒲盧之於桑蟲然

鄭氏註禮記中庸

觴酒豆肉讓而受惡民猶犯齒衽席之上讓而坐下民

猶犯貴朝廷之位讓而就賤民猶犯君

禮記坊記

治國雖用善道所宜而不更為講學使民知其道理如

農夫雖種嘉穀而不耘墜則苗不出茂厚實也

禮記正義禮記運

農夫耕田既畢以美善種子而種之聖王以禮正人情

既畢用此善道而教之

禮記正義禮運

十二月限分猶人才各有所長聖人隨人才而教之則

人竭其才之所長而為功

禮記正義禮運

父義母慈父能教而不能愛母則能愛而不能教言子

產若衆人之母但能恩慈食之不能嚴勵教之

禮記正義仲尼

燕居

子欲善而民善矣君子之德風小人之德草草上之風

必偃

顏淵論語

德之流行速於置郵而傳命

孟子公孫丑上

家語宓子賤仕魯為單父宰孔子使巫馬期往觀政焉

入界見鮒得魚輒捨之期問焉曰凡鮒者為得魚也何

以得魚卻捨之曰魚之大者名鱒鱒吾大夫愛之魚之

小者名鮒吾大夫欲長之是以得二者輒捨之

爾雅釋魚疏

夫上之化下下之從上猶泥之在鈞唯甄者之所為猶

金之在鎔唯冶者之所鑄

前漢書董仲舒傳

夫萬民之從利也如水之走下不以教化隄防之不能止也是故教化立而姦邪皆正者其隄防完也教化廢而姦邪並出刑罰不能勝者其隄防壞也

前漢書董仲舒傳

夫虎豹馬牛禽獸之不可制者也及其教馴服習之至可牽持駕服唯人之從臣聞揉曲木者不累日銷金石者不累月夫人之於利害好惡豈比禽獸木石之類哉期年而變臣弘尚竊遲之

前漢書公孫弘傳

雖見奇麗紛華非其所習辟猶戎翟之與於越不相入

矣是以欲寡而事節財足而不爭

前漢書
貨殖傳

化正天下易於決流抑隊

前漢書
貢禹傳

夫改政移風必有其本傳曰吳王好劍客百姓多創瘢
楚王好細腰宮中多餓死長安語曰城中好高髻四方
高一尺城中好廣眉四方且半額城中好大袖四方全

匹帛

後漢書馬
援子廖傳

若教化之廢推中人而墜於小人之域教化之行引中

人而納於君子之塗

後漢書荀
淑列傳

君如杆民如水杆方則水方杆圓則水圓上之化下猶

風之靡草

後漢書官者列傳

主簿聞陳元之過不罪而化之得無少鷹鷂之志邪覽

曰以為鷹鷂不若鸞鳳

後漢書循吏列傳

整齊風俗而輕脫威儀猶負薪救火無乃更崇其熾乎

吳志孫權傳註

桑甚甜甜鵝鵝革響乳酪養性人無妬心

晉書張天錫傳

夫廉恥之於政猶樹藝之有豐壤良歲之有膏澤其生

物必由然茂矣若廉恥不存而惟刑是御則風俗彫弊人失其性錐刀之末皆有爭心雖峻刑嚴辟猶不勝矣

晉書阮
種傳

招遙昏迴則天位正五教班叙則人理定

晉書皇
甫謚傳

教者治化之本人倫之始所以誘達羣方進德興仁譬

諸土石陶冶成器

宋書禮
一志

民之從義猶若迴風之卷草也

宋書文九
王建平傳

信食相資代為脣齒富教相假遞成輔車

宋書顧
覲之傳

命待教全運須化立譬以良醫之室病者所存

宋書顧
覬之傳

夫善政之於民猶良工之於埴也用功寡而成器多

宋書

良吏傳
史臣

生民之有學數猶樹木之有枝葉果行育德咸必由茲

南齊書武
帝本紀

嘉肴停俎定方旨於必甘良玉在攻表珪璋於既就是

以陶鈞萬品務本為先經緯九區學數為大

南齊書明
帝本紀

夫金之質也至剛鑄之可以成器水之性也柔弱壅之

可以壞山况乎肖天地之貌含五帝之德朱藍易染薰

猶可變固宜隨鄒俗而好長纓化齊俗而貴紫服

周書史臣

儒林傳

礫石變成瑜瑾菘莠化為芝蘭

隋書盧思道傳

若墾印塗猶防止水豈直譬彼耨耨均斯粉澤而已哉

隋書潘徽文學傳

黃帝問於伯高曰吾欲陶天下而以為一家為之有道乎伯高對曰請刈其莞而樹之吾謹逃其蚤牙則天下

可陶而為一家

管子地數

善氣逆人親於兄弟惡氣逆人害於戎兵不言之聲疾

於雷鼓心氣之形明於日月察於父母

管子內業

若夫教者標然若秋雲之遠動人心之悲藹然若夏之

靜雲乃及人之體鵬然若謫之靜

管子侈靡

鐘鼓成肆干戚成舞雖禹不能禁民之觀且夫飾民之

欲而嚴其聽禁其心聖人所難也

晏子春秋諫下

聖人之治虛其心實其腹弱其志強其骨常使民無知

無欲

老子安民

父不疑於其子子必孝兄不疑於其弟弟必共夫不疑於其婦婦必貞君不疑於其臣臣必忠是還至而効者

也

子華子北宮子仕

天高而難知有福不可請有禍不可避法天則戾地廣大深厚多利而鮮威法地則辱時舉錯代更無一法時則貳三者不可以立化樹俗故聖人弗法

鷓冠子近迭

風以動之變以化之猶泥之在鈞羣器之形自見

鬼谷子本

經陰
符注

羿蠡門者天下之善射者也不能以撥弓曲矢中王良
造父者天下之善馭者也不能以辟馬毀輿致遠堯舜
者天下之善教化者也不能使菟瑣化

荀子
正論

夫總方略齊言行一統類而羣天下之英傑而告之以
太古教之以至順與突之間簞席之上斂然聖王之文
章興焉佛然平世之俗起焉

荀子非
十二子

歷山之農者侵畔舜往耕焉期年畊畝正河濱之漁者

爭得舜往漁焉期年而讓長東夷之陶者器苦窳舜往
陶焉期年而器牢仲尼嘆曰耕漁與陶非舜官也而舜
往為之者所以救敗也

韓子
難一

堯舜之民可比屋而封桀紂之民可比屋而誅者教化
使然也故近河之地溼近山之土燥以其類相及也

陸子

無
為

儒者非能使人弗欲而能止之非能使人弗樂而能禁
之夫使天下畏刑而不敢盜豈若能使無有盜心哉越

人得甕蛇以為上肴中國得而棄之無用故知其無所

用貪者能辭之不知其無所用廉者不能讓也

淮南子精神訓

戎翟之馬皆可以馳驅或近或遠惟造父能盡其力三

苗之民皆可使忠信或賢或不肖惟唐虞能齊其美必

有不傳者

淮南子繆稱訓

昔舜耕於歷山暮年而田者爭處堯堦以封壤肥饒相讓釣於河瀆暮年而漁者爭處湍瀨以曲隈深潭相子當此之時口不設言手不指麾執玄德於心而化馳若

神使舜無其志雖口辯而戶說之不能化一人是故不道之道莽乎大哉夫能理三苗朝羽民從裸國納肅慎未發號施令而移風易俗者其唯心行者乎法度刑罰

何足以致之也

淮南子
原道訓

法能殺不孝者而不能使人為孔曾之行法能刑竊盜者而不能使人為伯夷之廉孔子弟子七十養徒三千人皆入孝出弟言為文章行為儀表教之所成也墨子服役者百八十人皆可使赴火蹈刃死不還踵化之所

致也

淮南子
秦族訓

其於化民也若風之搖草木無之而不靡

淮南子
秦族訓

天地之數不能獨以寒暑成歲必有春夏秋冬聖人之

道不能獨以威勢成政必有教化

春秋繁露為
人者天地

為人主者居至德之位操殺生之勢以變化民民之從

主也如草木之應四時也

春秋繁露
威德所至

夫赤子知慕其父母由審故也况為政興其賢者而廢

其不賢以化民乎

孔叢子
刑論

君子舞象小人擊壤上化使然又何足賞

孔叢子
叙世

孔子大聖也諸侯莫能用當小位於魯三月不令而行

不禁而止沛若時雨之灌萬物莫不興起也

鹽鐵論
國病

為治者不待自善之民為輪者不待自曲之木

鹽鐵論
大論

蓬山十里蟋蟀之聲猶尚存耳政事無如膺之矣

說苑
政理

昔禹與有扈氏戰三陣而不服禹於是修教一年而有

扈氏請服故曰去民之所事奚獄之所聽兵革之不陳

奚鼓之所鳴故曰教為務也

說苑
政理

大治之鑪可使無剛踊水之機可使無降善立教者若
茲則終身治矣故凡器可使與顏冉同趨投百金於前
白刃加其身雖巨距弗敢掇也善立法者若茲則終身
不掇矣故跖可使與伯夷同功

申鑒
政體

榮辱者賞罰之精華也故禮教榮辱以加君子化其情
也桎梏鞭朴以加小人治其形也

申鑒
政體

民有心也猶為種之有園也遭和氣則秀茂而成實遇
水旱則枯槁而生蘖

潛夫論
德化

善者之養天民也猶良工為麴豉也起居以其時寒溫
得其適則一蔭之麴豉盡美而多量其愚拙工則一蔭
之麴豉皆臭敗而棄損今六合亦由一蔭也黔首之屬
猶豆麥也變化云為在將者爾遭良吏則皆懷忠信而
履仁厚遇惡吏則皆懷姦邪而行淺薄

潛夫論
德化

聖人之規曲世若火之規曲竹治其節而削其枝頽其
榦而裁其根然後商販而為利工斲而為器今漢室之
形若曲竹何不倚而規之以匡輔其傾乎坐而策之以

宣裕其業乎為之禮樂以順導其民乎夫物曲則棄人
曲則弊世曲則傾唯智者覩形而知影是以規其所曲
而全其所直遊乎自然之原此仲尼之志度而管孟之

為也

天祿閣外
史去就

言虎悲嘯而吟則谷風至而應其類也以言君修德行

正則百姓隨而化也

王逸註楚
辭七諫

王良造父稱為善御以能使不良為良也如徒能御良
其不良者不能馴服此則馭工庸師服馴技能何奇而

世稱之故曰王良登車馬不罷駑堯舜為政民無枉愚

王充論衡
率性篇

三苗之民或賢或不肖堯舜齊之恩教加也楚越之人處莊嶽之間經歷歲月變為舒緩風俗移也故曰齊舒緩秦慢易楚促急燕戇投以莊嶽言之四國之民更相

出入久居單處性必變易

王充論衡
率性篇

璆琳琅玕者此則土地所生真玉珠也然而道人消爍五石作五色之玉比之真玉光不殊別兼魚蚌之珠與

禹貢璆琳皆真玉珠也然而隋侯以藥作珠精耀如真
道士之教至知巧之意加也陽燧取火於天五月丙午
日中之時消鍊五石鑄以為器磨礪生光仰以嚮日則
火來至比真取火之道也今妄以刀劍之鉤月摩拭朗
白仰以嚮日亦得火焉夫鉤月非陽燧也所以耐取火
者摩拭之所致也今夫性惡之人使與性善者同類乎
可率勉之令其為善使之異類乎亦可令與道人之所
鑄玉隋侯之所作珠人之所摩刀劍鉤月焉教導以學

漸漬以德亦將日有仁義之操

王充論衡
率性篇

賢君之治國也猶慈父之治家慈父耐平教明令耐使

子孫皆為孝善子孫孝善是家興也百姓平安是國昌

也

王充論衡
治期篇

善之勸惡如春雨澤

武侯十六
策陰察

大禹善治水而君子善導人導人必因其性治水必因

其勢是以功無敗而言無棄也

徐幹中
論貴言

鶴梟化為鴛鸞邪偽變成忠貞芳穎秀於斥鹵夜光起

乎泥濘

抱朴子外
篇君道

化上而興善者必若靡草之逐驚風洗心而革面者必

若清波之滌輕塵

抱朴子外
篇用刑

夫承蘭風以傾柯濯清波以遺穢者若沈景之應朗鑒

方圓之赴規矩

抱朴子外
篇嘉遯

以文雅為園囿以禮樂為場圃

李善註文選揚
子雲劇秦美新

風化所被近者逾深遠者稍淺故京師沈潛而要荒濯

沐也

李善注文選揚
子雲劇秦美新

衝波安流則龍舟不能以漂震風洞發則夏屋有時而
傾何則牽乎動則靜凝係乎靜則動貞是以淫風大行
貞女蒙冶容之誨淳化殷流盜跖挾曾史之情

文選陸機演連

珠
萍之依水隨水去留蘿之寄松隨松高下人俗與政化

遷變亦猶是也

文選潘安仁河陽縣作詩註

辭者主之弓弩教者君之機關

意林周生烈子

人之性如水焉置之圓則圓置之方則方澄之則渟而

清動之則流而濁先王知中流之易擾亂故隨而教之

意林物
理論

洗濯民心湔浣浮俗

意林
正論

浩浩大海百川歸之洋洋聖化九服仰之

藝文類聚刑
法部刑法賦

慙孺雉之聲朝惡細魚之在夜

藝文類聚雜
文部賦賦

鷲鳥感仁而革性鷓鴣乘化而變聲

藝文類聚
歲時部春

我化若風民應如草我靜如鏡物動猶煙

文苑英華梁
簡文帝帝德

頌上

不聽雜樂以變齊國之風不食鮮禽以斷荆王之獵

文苑

英華唐信
職官九誌

居蘭處鮑在其所習白羽素絲隨其所染是以金性雖

質處劍即凶水德雖平經風即險

文苑英華
庾信連珠

善治者使跖可信不能治者使伯夷可疑

太平御覽治
道部政治三

上德之政鷹化為鳩暴虎成狸此之謂也

太平御覽職
官部良令長

下

人化而為善禽獸化而為惡人而不善者謂之禽獸

太平

御覽人事
部欽人

載馳非轄不行臨政非教不賢

太平御覽
車部轄

麥之為蝶由於濕也爾則萬物之變皆有以也農民止
麥之化者區之以灰聖人理萬物之化者濟之以道

太平

御覽妖異
部變化下

鼎烹熟以養人猶聖君興仁義之道以教天下也

玉海
周易

鄭康
成注

變世化俗猶風之靡草民之從化猶魚之赴水

道德經
指歸卷

桀紂之吏可令順信秦楚之卒可令順善

道德經指歸卷十一

如鐵鉤能制狂象王治正化能伏惡人

大方廣佛華嚴經卷十二

故諸學者如世輪繩藝業所修如聚泥土王行正化如

匠埏埴

大方廣佛華嚴經卷十二

樹不伐本則枝不傾人主不化則道不行

提婆菩薩傳藉十

譬如神通人能變瓦石皆使為金

大智度論卷三十二

猶如好牛以少鞭杖則得調利

入大乘論卷下

風俗

庶民惟星星有好風星有好雨

書洪範

萬國同其風化若物在繩索之貫故云九州同風萬國

同貫

尚書正義禹貢

糾糾

音起

葛屨可以履霜

音織

女手可以縫裳

詩國風葛屨

關雎麟趾之化王者之風故繫之周公鵲巢駒虞之德

諸侯之風也先王之所以教故繫之召公

毛詩關雎

葛屨刺褊也魏地陘隘其民機巧趨利其君儉嗇褊急

而無德以將之

毛詩
葛屨

葛屨賤皮屨貴魏俗至冬猶謂葛屨可以履霜利其賤

也

鄭氏箋
詩葛屨

糾糾然夏日所服之葛屨魏俗利其賤至冬日猶謂之
可以履寒霜摻摻然未成婦之女手魏俗利其事新來

嫁猶謂之可以縫衣裳

毛詩正
義葛屨

豕之性能水又唐突難禁制以荆舒之人性好亂又勇
悍難制服言有豕之白蹄者領其衆豕離其繒牧之處

涉入於水波漣矣以興荆舒之君率其衆民去其禮義

之安居於亂亡之危矣

毛詩正義漸漸

且服奇者志淫則是鄒魯無奇行也俗僻者民易則是

吳越無秀士也

史記趙世家

人言楚人沐猴而冠耳

史記項羽紀

世人削方為圓撓直為曲豈待顧道德之清塗踐仁義

之區域乎

晉書熊遠傳

其升山赴險抵突叢棘若魚之走淵猿狖之騰木也

吳志

諸葛恪傳

影鷓冠於鄭伯之門躡珠履於春申之第

晉書輿服志

醜風潛煽醇源浸竭

晉書徐寧傳

吳婦人之脩容者急束其髮而劇角于耳蓋其俗自操東大急而廉隅失中之謂也故吳之風俗相驅以急

宋書

五行一志

末世之俗則不然煩稱文辭而實不效知譎相誕而情不應蓋先霜霰以戒裘鑪者矣機括存乎中而羣有詐

心者族攻之於外

子華子
神氣

竽也者五聲之長者也故竽先則鐘瑟皆隨竽唱則諸樂皆和今大姦作則俗之民唱俗之民唱則小盜必和故服文采帶利劍厭飲食而資貨有餘者是之謂盜竽

矣

韓非子
解老

故有大路龍旂羽蓋垂綵結駟連騎則必有穿窬拊捷抽箕踰備之姦有詭文繁繡弱緡羅紉必有管籥跣踣短褐不完者故高下之相傾也短修之相形也亦明矣

淮南子
齊俗訓

羌氏僂翟嬰兒生皆同聲及其長也雖重象狄隄不能通其言教俗殊也今令三月嬰兒生而徙國則不能知其故俗由此觀之衣服禮俗者非人之性也所受於外也夫竹之性浮殘以為牒束而投之水則沈失其體也金之性沈託之於舟上則浮勢有所支也夫素之質白染之以涅則黑縑之性黃染之以丹則赤人之性無邪久湛於俗則易易而忘本合於若性

淮南子
齊俗訓

丹穴太蒙反踵空同大夏北戶奇肱脩股之民是非各異習俗相反君臣上下夫婦父子有以相使也此之是非彼之是也此之非非彼之非也譬如斤斧椎鑿之各

有所施也

淮南子
汜論訓

夫文繁則質衰末盛則本虧末修則民淫本修則民慤

鹽鐵論

本議

利則虎曳病則鳥折

鹽鐵論
備胡

江南有橘齊王使人取之而樹之於江北生不為橘乃

為枳所以然者何其土地使之然也今齊人居齊不盜
來之荆而盜得無土地使之然乎

說苑
善說

古之魯俗塗里之間羅門之羅收門之漁獨得於禮是
以孔子善之夫塗里之間富家為貧者出羅門之羅有
親者取多無親者取少收門之漁有親者取巨無親者

取小

說苑
政理

五鳥六鵠相對蹲踞禮讓不興虞芮爭訟

焦氏易林大
壯之歸妹

有山者採有水者漁

博物
志

東南之人食水產西北之人食陸畜食水產者龜蛤螺蛤以為珍味不覺其腥臊也食陸者狸兔鼠雀以為珍物不覺其膾也

博物志

夫方土所資自然而能故吳越之用舟燕朔之乘馬得之於水陸之宜不假學於賢智慎到曰治水者茨防決塞雖在夷貊相似如一學之於水不學之於禹也

張湛注列

子湯問

積習則忘鮑肆之臭裸鄉不覺呈形之醜

抱朴子外篇循本

慕之者猶宵蟲之赴明燭學之者猶輕毛之應飄風

抱朴

子外篇
疾謬

遭雨巾壞猶復見倣不覺其短皆是類也

抱朴子外
篇正部

軒車不可以適越冠冕不可以之胡古之道也

文中子
周公

音有楚夏者土風之乖也情有險易者習俗之殊也

文選

魏都
賦注

匈奴常言漢極大然不能耐饑渴失一狼走千羊

補文
選漢

武帝輪
臺詔

人情玩於所習純風日去華競日彰猶火之消膏而莫

之覺也

補文選戴
邈學校疏

喻林卷九十八